

氏族典第五百三十三卷

郭姓部列傳六

明二 郭孝

按仁和縣志孝字可忠仁和人嘉靖己未進士任刑部主事時海瑞以直諫忤上意欲寘極典大司寇有依違意孝忿然曰禍在一時議在百世遂署牘以進無何分宜獄起叅論諸疏多出孝手中外以爲快歷員外郎中出爲湖廣僉事備兵惠潮嶺表盜賊充斥孝至大修戰具遣人諭以禍福遂大破之當事者忌其功以郊迎後時爲罪遂罷歸未幾起補河南再遷江西副使分巡饒南饒亦多盜孝至增置戰艦星布要津賊發卽受捕江道遂清尋轉福建叅政後陞貴州按察司致仕歸孝歷官三十年產不及中人

郭時斗

按金華府志時斗字文起蘭谿人任清遠知縣兼鹽務中貴及私牙不得售其奸後左遷兩淮鹽幕會稅銀解期甚迫上司檄以屬時斗時斗列貧商良商頑商三等貧商蠲其徵良商令自立限頑商

古今圖書集成
則催拘嚴比商咸感愧輸將恐後擢潯州府推官多所平反粵西大盜窟宅韋公廩結連諸洞入寇時斗密募忠勇授以方略盡行破滅又有女官秦氏抗不奉命時斗出奇計生致之當時謂功不在王文成下後知高唐歲旱躬詣窮鄉酌口賑濟民賴以甦尋以病乞休百姓泣留不得後尸祝之

郭仁

按龍溪縣志仁字明倫龍溪人嘉靖間以貢任梧州訓導勵名節正師道諸生咸敬憚之

郭萬程

按福清縣志萬程字子長福清人蚤孤家貧刻意力學歲荒嘗負米百里外母肺疾寒無被與妻盧抱母而溫以背通覽經書淹博鉤貫不以得失動心嘉靖乙未登進士上荒政鄉祠社學僧田均驛弭盜六議守選三歲授徒傳經除刑部郎鞫訊明允有奏獄干權貴諸郎逡巡不敢治萬程疾作扶病往按其事竟輸服之後遂卒

郭遇卿

按福清縣志遇卿字建安萬程之子幼孤事母孝葬父貧不能舉躬負土成墳與弟造卿相友愛嘉

靖末戚繼光平倭寇遇卿從之薊門提兵擦崖立功白羊峪靖妖毳毳洞歷官至都指揮使後以母老歸生平所著有龍洞集五卷藏于家

郭仁顯

按大田縣志仁顯大田人喜施與樂教誨以孝友爲鄉人表嘉靖初年饑盜四起掠食鄉中惡少效尤者陰部署已定將行仁顯知其謀盡籍居人聯爲保伍法日聽其生業夜按籍而閱之出藏粟貸貧乏遂無一人得爲亂復推其法於他族地方賴以靖焉鄉人德之

郭奇逢

按大田縣志奇逢字際時大田人幼以孝聞稟資穎異過目成誦膺貢大廷除授江西饒州通判政尚仁恕士民德之丁父母憂哀毀骨立水漿不入口者數日終喪獨處一室不御酒肉凡六年祀事必齋戒謹懃墓祭雖遠必躬與勿以衰老懈云

郭應聘

按莆田縣志應聘字君賓莆田人嘉靖庚戌進士歷官副都御史廣西巡撫時羅陽巨寇韋金彪等

數出剽江上設計擒之又平江府峒獠及懷遠諸獠勦永福諸寇水戰陸戰握兵至七十餘萬下堅壘百十餘盡入版圖復條上懷永善後十事詔從之加兵部侍郎旋召入爲戶部侍郎以憂歸久之諸獠復熾詔以兵部侍郎再撫西粵至則諸獠各鳥獸散三年晉右都御史兼侍郎總制兩粵尋陞南京兵部尙書參贊機務致仕卒贈太子少保諡襄靖

郭尙謙

按泉州府志尙謙字鳴吾晉江人爲郡諸生嘉靖季倭亂尙謙謂兄尙友曰賊來必縱火兄護母避之吾將與父櫬存亡矣因以麻經自繫柩側賊駭而問之曰有父櫬在如有他虞願以身代賊加刃其頸撫棺悲慟賊感傷舍去賊退乃葬父而昇母於郡城教授生徒供養人稱爲郭孝子

郭大治

按廣州府志大治字思道番禺人少警敏稱神童遊湛若水之門甚奇其才父被誣大治號哭臬庭三日夕臬大夫與語才大治遂出其父嘉靖辛卯舉于鄉諭萍鄉迎父就祿日課程諸生周其寔警其惰竟以不逢迎嚴相嵩七年不調父喪哀毀幾絕徒跣三千里扶櫬歸葬祭一式古復除虞城轉

浙新城令後以不阿上官遂拂衣歸

郭鎮

按保定府志鎮字子靜雄縣人嘉靖時舉人茲仕山東臨朐令邑蝗災鎮爲文禳之忽大鳥飛吞蝗吐於水者三日聞父病泣歸侍不及待封印而去人曰才更孝子

郭天祿

按保定府志天祿定興人第進士令江西永新授御史按山西以親老徘徊閨月坐宿命遷沂州僉事至則設方略緝礦盜地方用寧父艱毀滅性千里步歸復補山東驛傳副使執法不畏強禦致仕歸分俸贍宗人及鄉鄰貧者

郭棐

按廣州府志棐字篤周南海人幼師事湛若水與聞心性之旨嘉靖壬戌成進士授戶部主事尋改禮部會穆宗卽位次日傳封七夫人御札出棐力諍事得寢後歷官光祿寺正卿致仕卒所著有粵大記嶺海名勝記廣東四川通志夢菊全集齊楚滇蜀諸稿士林宗之

郭敬賢

按潮州府志敬賢字桂溪海陽人嘉靖間進士授翰林院庶吉士以忤嚴分宜謫通州判官時論偉之尋陞工科給事抗疏極陳時政累官至禮科都給事

郭都

按明外史張達傳嘉靖三十一年寇入深井堡宣府副總兵官郭都戰三日斬獲甚多追至淘沙堡兵疲無援陷圍中身被數十創死諡忠壯都廣寧衛人起家世廕

郭能

按六合縣志嘉靖二十二年倭奴入寇能應募禦之死于陣

郭江

按明外史張達傳嘉靖三十四年固原總兵官郭江遇寇於暗門死

郭脩翰

按名山藏脩翰吉安永豐人其父僑寓興寧縣而生脩翰童子時母命爲市辭曰識字急於市讀易

讀史手不釋卷市童衆咻之母老育廢脩翰曰採給行傭吾不如江次翁遂窮通天文七政讀書賣卜于市得錢供母而星學名一時自知死期云我六旬有六六月六日無生理及時而病鄉士夫羅俶往問之脩翰曰而命先我猶相問耶羅以三日脩翰以六日

郭春渠

按萬安縣志春渠字以受萬安人少負鉅志家故貧弱冠理家雖室無儲粟而事親務盡其懽年三十妻死不復娶爲郡學生歲貢序次第二督學使者欲越次拔之固辭後仕連江教諭擢國子助教卒其文行皆爲世重

郭遵

按萬安縣志遵萬安人邑庠生曾出穀濟荒建橋利涉割田供祭所著有易經本義行世旨論曉人郭然

按咸寧縣志然字用可以咸陽學中隆慶庚午舉人授寧鄉知縣剛直廉潔時寧鄉荒旱然百方救賑全活甚衆後歷陞沁州知州致仕

郭慶元

按陝西通志慶元淳化人幼孤賴嫡母齊撫養爲童子時事齊已能孝及長益篤生母劉旣嫁迎歸亦善事奉

郭强

按登州府志强棲霞人未事詩書天性純孝母沒廬墓三年負土築墳偶得清泉流于其側服滿泉涸

郭堵

按曹州志堵字宣澤萬乾人隆慶戊辰進士歷官陝西副使兵備西寧番部種馬者官易以茶堵至預陳禍福揭之境上屈期番部肅然聽命

郭大綸

按太平府志大綸博興人隆慶間以進士任太平通判清廉多惠政歷署三邑民戴之若父母相率謠云郭公若去天無眼黃犬重來地沒皮黃指郡守泮也

郭子直

按海鹽縣志子直字舜舉海鹽人隆慶辛未進士初任禮部主事以裁冗費忤中貴謫懷仁尉後累遷嶺南督學使者甄拔皆名士已攝篆南韶虔寇王子龍餘黨嘯聚朝議用兵子直力主撫全活以萬計功上受欽賞再遷閩憲副以病乞罷所著有三遊二京中林諸集行世卒年七十九

郭瑄

按崇寧縣志瑄任兵科給事中歷參政治行著聞孝友篤至父喪廬墓悲泣時稱其孝

郭思極

按魏縣志思極字致中隆慶戊辰進士授遂平知縣擢監察御史巡按遼東南直湖廣轉大理寺丞晉少卿尋陞僉都御史巡撫應天丁艱回籍思極長才大器每有卓識

郭宗賢

按廣平府志宗賢字楨甫邯鄲舉人知文水縣輯城垣復除延津擢御史條陳四事兼名實嚴公私酌取舍審進退彈劾不避權要遷臨鞏兵備時有警以火礮攻之敵遁去改雲南水利道清屯甦站

軍民德之晉太僕寺少卿致仕

郭光煥

按開州志光煥天性至孝能色養閭里式慕有司旌其門

郭佳鎮

按廣平府志佳鎮字重明宗賢子進士知確山縣調壽光鋤強宇弱恩威兼濟擢戶部主事司權河西務革除夙弊陞開原道調武德道催督漕運嚴飭海防官民稱便旣請告歸

郭潤

按鷄澤縣志潤字瞻孔由鄉薦令沁源勸民爲善不忍用刑有不得已而用者往往流涕甫數月以疾辭官歸

郭都

按鷄澤縣志都字舜俞魯鈍質朴寡言笑動合規矩讀書雖盛暑必親燈火家貧竭力奉親事祖母韓氏以孝聞田園數畝悉以讓弟以明經訓滄州再訓確山遇諸生若子弟三年兩代確庖惟守印

以俟後令不與錢穀詞訟至于大利大害輒毅然爲民請命遷延雲諭告休鰥居二十載自奉甚薄年八十九猶事詩文楷草手不釋卷著有西田文集算書行於世

郭鏞興

按遷安縣志鏞興右衛人進士授金華推官刑清民服修通濟橋拜御史按宣大遼東糾劾權貴有直聲轉山西副使節省糧耗軍民甚便督修邊牆以勞瘁卒于官囊無餘貲

郭汝

按任丘縣志汝號西圃山東濟南府人進士隆慶五年任任丘縣政能識體教必身先釐奸剔弊省費均徭擢御史

郭承恩

按黃州府志承恩字惺寔蘄州人性靜無他嗜務精經史及先天理數之學舉歲貢轉漢州什邡知縣冰蘖自矢暇與諸生肄業鄰封多負笈至者告歸惟講學性理是務年八十九長嘯而逝

郭壽

按岳州府志壽字先五澧州人隆慶中舉人由建德令左遷臨清判甚有直聲後移判成都壽爲人沉靜端方蕭散物外著有栗園集

郭莊

按陝西通志莊字子莊徽州人隆慶戊辰進士授御史按吳吳貴人子弟多所關說莊曰吾安肯以私廢三尺一切以法治之又按蜀會多盜曰安可當吾在而使盜熾檄府道勅治遂息爲蜀府請旨得允王餽以金曰吾豈以金而爲王役卻弗受王益重之

郭敦

按順天府志敦興州前屯衛貢士任懷集知縣政教播于苗蠻後告歸囊中惟圖書數卷而已

郭汝宣

按萬載縣志汝宣字贊明萬載人萬曆間歲貢邑人有晏三綱者無罪受誣汝宣代白于邑令得釋晏有女願爲婚以報汝宣辭謝邑令聞之親爲執斧勸之再三始娶晏氏嘗書一聯云願留餘巧還造化多積陰功與兒孫生平隱德不可枚舉

郭彥正

按萬載縣志彥正字天福號敏齊萬載人事父母以孝聞居鄉和睦正直爲人敬服

郭孜仁

按萬載縣志孜仁別號洞山萬載人爲人曠達不羈當事交薦之授經歷不就年九十二卒

郭萬象

按萬載縣志萬象號鼎梅萬載人嘗傾貲五百餘金修學宮遇人有鬻妻子者出貲代贖雖多不惜

郭鼎藩

按涇陽縣志鼎藩字翰于萬曆間舉人授沔縣教諭時流寇率數萬薄城下縣令懼鼎藩泣勵義勇慨然以城守自任隻身入營以理論之寇圍解邑賴以安陞應州知州卒所著有青箱別業洞庭記敵秋齋詩集

郭性之

按陝西通志性之字鹿坪華州人萬曆間進士仕至河南左布政使惇大寬仁用心精密民間疾苦

無不周悉決疑獄遠近稱神籌兵餉士馬贍足致政歸所著有抱甕丈人稿

郭石麟

按保定府志石麟字爾祥雄縣人用廕補官爲上林苑監丞丈苑田增課額敏而有爲陞工部主事巡視京城守禦具勞而罔怠陞員外以瘁卒

郭文通

按保定府志文通字用魁慶都人由吏員任廣東碣石衛經歷時猺賊溫七等作亂文通率兵破其巢斬獲無算陞肇慶府同知適猺賊掠高明等縣文通冒險平之詔賜紵絲白鏐以旌其功以瘴癘成疾乞歸

郭良時

按保定府志良時字靜宇束鹿人讀書樂道足不履城市家故貧以產業讓弟設帳授書以糊其口人以盛德重之

郭大德

按重慶府志大德銅梁巴川里人弱冠勤學敦孝友隨父宦遊湖廣蘄州途館拾得千金住月餘候失主至還之居鄉施給棺槨殯葬千人出嫁孤女貧力不能耕者輒助以衣食其生平好義若此

郭士吉

按南宮縣志士吉字希叅京都人隨父繼祖爲南宮廣文因家焉萬曆丙戌登進士選庶常歷官宣府口北道大叅精明強幹所至有能聲以病致仕子三皆邑諸生工古文辭有父風季子履順戊寅死難

郭實

按高邑縣志實萬曆癸未進士任陝西朝邑知縣邑奸吏舞文實至以次論如法訟獄造庭不移晷立判五年擢御史後以抗疏激上怒謫尉懷仁旋擢刑部主事調吏部命不下竟落籍歸貧困至餓粥不具後二十年復起爲刑部主事歷僉都御史

郭本

按彰德府志本安陽人母歿哀毀幾死既葬廬墓次負土起墳又作臺高一丈曰思親詔旌其門

郭興治

按東光縣志興治號熙明東光人萬曆庚戌進士除行人司行人授工科給事中歷陞太僕寺正卿告歸日與遠近知交論文說詩經史子集無不畢覽著有夢乘榮木菴遺稿等書藏於家

郭璫

按彰德府志璫曲沃人舉人知湯陰縣性朴直躬節儉以先民時有大猾王朝政兄弟橫行里中前令莫敢問璫毅然捕以正法民至今歌之

郭田

按彰德府志田安陽人邑諸生父喪廬墓母沒亦如之學使郡守皆表其門

郭重

按武安縣志重武安人少穎敏有奇志謹介不好狎戲嚴靜寡言笑遇妻子如嚴君事親孝堂叔聰言俱早逝遺二女曲爲撫育擇婿嫁之待臧獲亦仁恕以舉人授京兆理刑民稱無冤擢戶部主事督延綏遼東糧儲再理通州清源關稅課清慎一無所取乞休後茹蔬衣布數年而卒